



31. marts 2026

Iluarsiissut

UPA 2026/121

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Uummannami Upernavimmilu eqqakkanik ikuallaavimmik pilersitsisoqarsinnaanera pillugu apeqquteqaat aallaavigalugu oqallinnissamik siunnersuut

(Inatsisartunut ilaasortaq Aqqalu C. Jerimiassen, Atassut)

Avannaata sumiginnarneqarnerujussua naammaqaaq!

Nunatta avanna sinerissap sinneranut sanilliullugu nipaanneroqaaq, naak sorparujussuartigut annertoqisumik katataaqqangaluarluni, aali uani maanna eqqakkanik suliaqarneq kisiat eqqartorneqarniartoq, qanorli angallannikkut sanaartornikkullu tungassuteqartut eqqartorneqartuuppatattaq.

Ukiut tamarluinnaasa eqqakkat katersorneqartut poortorneqarnikut sikuunerani tulukkanik ammaaterneqarlutik teqqartut, aasanerani niuungassuit illoqarfik aneerriffisaajunnaajusallugu, eqqakkat imaanut nakkaasut, illoqarfiup iluanut teqqartut, ikuallaagallarsinnaanermut piumasaaqatit ingattarsingaaramik angumasassaangigajattut.

Ila iluarsisariallit taajugassagut amerlaqaat!

Ikerasammiit Ukkusissanut, Upernavik Kujallermiit Kullorsuarmut, nunaqarfippassuit avannaani eqqakkatigut assorsuaq unammillernartumik inissisimapput, soq tamanna taamaattussarineqaannassua?

Esani sikusanngitsumiikkaanni torrasoorpasippoq, taannali nunatta qeqqaniit kujasinnerusumut tulluurtumik ilusilingaavoq, sikusartunut tulluannigilaq.

Eqqartorsinnaannginnerparput maanna pimoorusamik Uummannap Upernaviullu namminneq nutaaliaasunik ikuallaaveqalersinnaannginneri? Kiassarnikkut innaallagissiornikkullu tapertaasinnaasussanik, immaqalu siunissami naluttarfeqalersinnaanissaannut kissamik tunioraasinnaanissamut atorluarsinnaasumik. Ajoraluaqaarmi ukiut tamarluinnaasa eqqagarpassuit talittarfinnut tunisassianik assartuiniarnermi atorneqartartunuttaaq aqqunneqartarput, umiarsuarnut ikineqassatillutik, ila tamanna nunani allani pisisartutta paasisuuppasuk nunatsinnut ajunaarnersuartut ittumik tunisassiornikkut kinguneqassagaluarpoq, tamanna aamma utaqqiinnarniarnerparput?

Oqallisigilaartiguli maanna politikikkut qanoq tamanna aqqiivigineqarsinnaanersoq, qanorlu ililluta pingaarnersiunikkut tamanna angusinnaajumaarnerlutigu.

Oqallilluarisi.